



Վերջերս ՀՀ Առողջապահության նախարարության կողմից ընդունված բարեփոխումների ծրագիրը հանրության շրջանում ընկալվեց տարբեր կերպ: Այս կարևոր հարցի և Բյուրեղավանի պոլիկլինիկան նեղ մասնագետներով համալրման հարցերի շուրջ խոսեցինք «Բյուրեղավանի քաղաքային պոլիկլինիկա» ՓԲԸ-ի տնօրեն Միքայել Միքայելյանի հետ:

-Պարոն Միքայելյան, մարտի 1-ից ուժի մեջ մտավ «Դեղերի կարգավորման մասին» օրենքը, որով կարգավորվում է դեղերի շրջանառությունը Հայաստանում: ՀՀ առողջապահության նախարար Լևոն Ալթունյանը հայտարարել էր, որ 4500 դեղամիջոցից 2500-ը բաց կթողնվեն դեղատոմսերով, մնացած 2000-ի վաճառքն ազատ կլինի: Այս հարցը մեծ արձագանք գտավ հանրության շրջանում: Ի՞նչ կասե՞ք՝ արձագանքը Բյուրեղավանում ինչպիսի՞ն էր:

Մ. Միքայելյան- Նախ ասեն, որ դեղատոմսով դեղ դուրս գրելը մեր երկրում շատ վաղուց է իրականացվում: Դա քաղաքակիրթ մոտեցում է և շատ երկրներում է օգտագործվում: Այո՛, դա ճիշտ որոշում էր, քանի որ դեղը բուժական միջոց է և դրա ինքնուրույն օգտագործումը կարող է հանգեցնել տարբեր բարդությունների: Առանց բժշկի հսկողության դեղերի օգտագործումն անընդունելի է: Վստահեցնում եմ Ձեզ՝ մարտի 1-ից մինչ օրս, մեզ մոտ արտառոց խնդիրներ չեն առաջացել: Բժիշկները բուժառուների հետ աշխատել են կանոնակարգված, առանց ավելորդ դժգոհությունների: Իմ հանձնարարությամբ բժիշկներին բաժանվել են դեղատոմսերի բլանկները՝ անկյունային շտամպով: Իզուր է մեր ազգաբնակչությունը խուճապի մատնվել: Վստահեցնում եմ, որ այս ծրագիրը կաշխատի, դրանում ոչ մի խոսք: Դեղը կոնֆետ չի, որ կիլոգրամով գնեն, այն բուժական միջոց է, որը պետք է նշանակվի բժշկի կողմից: Ծրագիրը գործարկվում է փուլ առ փուլ:

-Էլեկտրոնային առողջապահական համակարգի ներդրումով, որքանո՞վ պաշտպանված կլինի քաղաքացու անձնական տվյալները: Գործընթացն արդեն սկսվել է, մեր համաքաղաքացիներն ինչպե՞ս են վերաբերում այդ հարցին:

Միքայել Միքայելյան- Էլեկտրոնային առողջապահական համակարգում քաղաքացու

անձնական տվյալները հուսալիորեն պաշտպանված են: Համակարգ մուտք գործելու հասանելիություն ունի միայն քաղաքացին և իր բժիշկը՝ այն էլ պացիենտի համաձայնությամբ: Միաժամանակ, մուտքի բոլոր դեպքերը համակարգում գրանցվում և պահպանվում են, և քաղաքացին իր անձնական էջից կարող է վերահսկել դրանք: Մինչև հիմա հիվանդանոցում գրվում էր պացիենտի հիվանդության պատմագիրը, հիմա այն շարունակվելու է նաև էլեկտրոնային տարբերակով: Չեմ կարծում, որ այս համակարգը ներդնելով մենք ուսնահարում ենք մարդու իրավունքները:

-«Բյուրեղավանի քաղաքային պոլիկլինիկա» ՓԲԸ-ում նեղ մասնագետներ չլինելու պատճառով տվյալ կաբինետները չէին գործում: Ի ուրախություն մեզ, կաբինետներն այսօր գործում են և համապատասխան մասնագետները շաբաթվա տարբեր օրերին սպասարկում են հիվանդներին:

Միքայել Միքայելյան - Նոր կաբինետները վերաբացելով կարողացանք բավարարել մեր ազգաբնակչության պահանջները: Պոլիկլինիկան համալրվել է նոր բժիշկներով՝ քիթ-կոկորդ, ակնաբույժ, գինեկոլոգ, էնդոկրինոլոգ, վիրաբույժ: Կարիք կա միայն բժիշկ-նյարդաբանի: Մասնագետները փորձառու են: Այսօրվանից մեզ մոտ աշխատանքի է անցել մանկաբարձ-գինեկոլոգ Կարինե Սարգսյանը: Բավականին փորձառու բժշկուհի է, 38 տարի աշխատում է այս ոլորտում: Մեծ հույսեր ենք կապում նրա հետ: Կարծում եմ, որ մանկաբարձ-գինեկոլոգի ծառայությունը մեր համայնքում առաջընթաց կապրի և հղիների հոսք կունենանք: Կազմակերպչական առումով մենք դեռ անելիքներ ունենք: Նպատակ կա մինչև տարեվերջ ընդհանուր գործիքային հետազոտություններն ամբողջ ծավալով կազմակերպել տեղում, որպեսզի մեր հղին ստիպված չլինի այցելել այլ բժշկական հաստատություն: Մեր համայնքի բնակիչները գոհ են քիթ - կոկորդի և էնդոկրինոլոգի ծառայություններից: Բժիշկների աշխատանքային օրերին կաբինետների դիմաց կուտակումներ են լինում, աշխատում են ծանրաբեռնված: Կարևորը՝ բուժառուների մոտ վստահություն կա: Նույնը կարող եմ ասել մյուս մասնագետների մասին: Վճարովի ծառայությունների համար ընդլայնելու տեղ ունենք և հնարավորության դեպքում ծավալը մեծացնելու ենք: Կա սահմանված ծառայություններ և գնացուցակ, որից կարող են օգտվել ցանկացողները:

22.03.18

Վերջերս ՀՀ Առողջապահության նախարարության կողմից ընդունված բարեփոխումների ծրագիրը հանրության շրջանում ընկալվեց տարբեր կերպ: